

## **Rau Ite Inim Ru To Paulus Imbooda Ila To Timoti 2 Timoti—2 Timothy**

<sup>1</sup> You Paulus. Maaron itaghon tau lolo ve ighur ghou nanim mbanooŋa to Yesu Krisi. Leso navotia saveeŋ mbuaaŋ toni pa tamtoghon, ve napatoot di pa nepooŋ poia to ye ighaze igham padi. Nepooŋ tonowen, tamtoghon to tineep tunja ila to Yesu Krisi, to pale tighami.

<sup>2</sup> O natug Timoti, you lolog payom kat, tauto nambood rau tonene ilat tiom. *Mban 16:1+; 1Tim 1:2*

Poia to Tamaan Maaron ve Tiina toit Yesu Krisi iza tiom, ve lolodi isamin ghom ve tiuul ghom, ve tingin ghom uneep pooi toman lolom luuma. Onoon.

*Paulus ipariaaŋ Timoti pa iyoon ariana ve ivotia varu poia*

<sup>3</sup> You nambesmbees pa Maaron ve nataghon ngar to nawatagi ila lolog naghaze nene ingalaan ila ye mata, inimale muuŋ nditimbug tighamghami. Ve mbon ve ndag, matag ingalngal ghom, ve naghurghur ghom ila suuuŋ tiou, ve napapait Maaron toman lolog poia pa ngar poia to yom ughamghami. *Mban 22:3; Pil 3:5+*

<sup>4</sup> You matag ingal imuul ila pa sawa to ituru tawapulun ghiit, ve naghita tanjiiz tiom toman matam suru. Tauto nanazuuv ghom naghaze naghita ghom rita, ghoru igham ghou lolog poia le poia kat.

<sup>5</sup> Ve naghām ṅgar paam pa gabuam to ughur ila to Krisi toman lolom. You nawatag: Ghurla tiom, nene mbeb tau, inimale timbum liva Lois ve tinam Yunis ghurla todi. *2Tim 3:15*

<sup>6</sup> Tauto naghaze napamundigin ghom muul. Leso ṅgar ve tapiri to Maaron ireii payom, ineep sorok sob, ve ugham uraata le ivot inim tiina, inimale tamtoghon tivib yab, ve ighan tiina iza. Maaron igham tapiri ve ṅgar tonanan payom, indeeṅ sawa to you naghur nimag izala poghom.

*1Tim 4:14*

<sup>7</sup> Yom uwatag: Avuvu to Maaron igham pait ne, ye irau igham ghiit tamatughez maau. Ye ipapalot ghiit. Leso tanḡin tauud pooi, tayoon ariana, ve lolood pa tamtoghon ve tagham poian di. *Ro 8:15*

<sup>8</sup> Onoon, aazne tighur ghou naneep ila ruum to yabyabuṅ lolo pasa, nataghon Krisi. Eemoghon ṅgar to tigham payou ne, mayam pani malep. Ve mayam pa votiaan varu poia to Tiina toit malep. Yom irau upariaan saveeṅ toni, lesa tamtoghon tighur ila toni. Ve ugham tapirim ila to Maaron, ve uyoon ariana ve umbaad pataṅani pa varu poia unumale you. *Mk 8:38; Ro 1:16; 2Tim 2:3, 4:5*

<sup>9</sup> Maaron igham mulin ghiit, ve ipoi ghiit tanim le, lesa tataghon ṅgar patabuan. Ve iit tagham ṅgar poia eta, to ye ipoi ghiit pani ne maau. Ye itaghon tau lolo, ve poia toni. Muuṅ kat, sawa to mbeb eta ivot sone, ye mata inḡal pataghaan ighaze igham poian iit tamtoghon to taneep tunja ila to Krisi. *Ro 8:28; Ep 1:4, 2:8+; 1Tes 4:7*

<sup>10</sup> Ve aazne, Volaana toit Yesu Krisi izi inim taan, ve ipatoon poia to Maaron tonowen ivot ighazoon, ve ipasob mateeṅ tapiri wa. Varu poia ipatoon ghiit

pa ataam to tagham nepoon poia ila to Maaron ve taneep mataad iyaryaar le alok. *1Kor 15:54+; Hib 2:14+*

<sup>11</sup> Maaron ighur ghou nanim mbanjoona toni, lesu navotia varu poia tonene pa tamtoghon ve napatoot di pani. *Mban 9:15; Ga 1:15+; 1Tim 2:7*

<sup>12</sup> Pughu tonene to aazne nambaad patajani naol. Eemoghon namatughez maau, ve mayag maau. Pasa, you nawatag Ngeu to naghur ila toni, ve naghur ila kat naghaze: Varu poia to ye ighuri inim nimag, ye tau pale ingin poiani le irau sawa to imuul inim.\* *Ep 3:1+; 1Pe 4:19*

<sup>13</sup> O Timoti, saveen poia to uloonja ila you avog, nene ipatoon ghom pa sa saveen to yom irau upatoot tamtoghon pani, lesu ghurla todi iyaryaan ve lupuun to Krisi ilaan poia. Tovenen matam kisini ve utaghoni. Ve uneep tunja ila to Krisi, ve ukis ghurla tiom ariana, toman ngar to lolood pa Maaron ve tamtoghon. *2Tim 3:14+; Hib 10:23*

<sup>14</sup> Varu poia to ilat nimam, nene mbeb tau. Tovenen matam pani ve ungin poiani. Avuvu Patabuan to inepneep ila lolood ne, pale ipalot ghom, lesu ugham tovene. *1Tim 6:20*

<sup>15</sup> Yom uwatag: Nditaad to taan suruvu to Asia, tisob tipul muridi payou wa. Ndiran tonowen, todi ru, nene Pigelus ve Ermogenes.

<sup>16-17</sup> Eemoghon Onesiporus toman yes to tinepneep tomani ila ruum toni, Maaron pale lolo isamin di ve iuul di. Onoon, aazne you nanepneep

---

\* **1:12:** Ataam ite to tator saveen waaro tonene, nene vene: 'naghur ila kat tovene: Ye pale ingin poian ghou le irau sawa to imuul inim. Pasa, you naghur taug ila nima wa.'

ila ruum to yabyabuun lolo, ve tikau nimag ve agheg pa sen. Eemoghon Onesiporus imatughez maau, ve maya payou maau. Sawa to inim Rom, ye ikalkaal ghou le inim ivot tiou. Ve sawa naol, inimmim ingigig ghou, ve ipapalot ghou, ve iuluul ghou.

*Mt 25:36; 2Tim 4:16; Hib 13:3*

<sup>18</sup>Ve yom uwatag: Muun, ye iuul ghou kat izi ndug Epesus. Tauto naghaze Mboñ Muri, Maaron pale lolo isamini ve igham mulini.

## 2

### *Timoti irau iyoona ariana pa badoon patañani*

<sup>1</sup>Tovenen natug Timoti, matam ingal poia to Maaron to taghami ila to Yesu Krisi. Leso ipalot ghom ve uyoona ariana.

<sup>2</sup>Ve saveen isob to nasavia ila ival tiina matadi ve yom uloona, usakia ila pa tamtoghon pida to yom ughita di ughaze yes tiraua, ve unumeer di ughaze yes pale tinidi imbees pa uraat to Maaron. Leso anadi tipatoot tamtoghon pida pa saveen tonenen, ve uraat to varu poia iseennga itaghoni gha ila.

*Tit 1:5*

<sup>3</sup>Uraat to votiaan Krisi varu, ye le patañani. Tovenen yom irau unum toman ghei ve itina tambaad patañani tonene. Leso unum ndaaba poia eez to Yesu Krisi.

*2Tim 1:8, 4:5*

<sup>4</sup>Yom uwatag: Yes ndaaba matadi ilala pa uraat ite paam inimale tamtoghon pida ne maau. Yes tineep ila uraat to malmal moghon. Leso tigham daba todi lolodi poia pa uraat todi. Yom irau ugham tovene paam.

<sup>5</sup> Tamtoghon to ighaze ilaan pa landoon tiina, ye irau itaghon tutuun to landoon, ghoru irau igham atia to yes to tilaan le tilib. Ve ighaze itaghon tutuun to landoon maau, nene irau ighami maau.

*1Kor 9:25+*

<sup>6</sup> Ighaze sawa to taitain ivot, nene irau tighur ngeu to igham uraat tiina pa vazogiin aniin ne le ndamo muun, ghoru poia.

*1Kor 9:7,10*

<sup>7</sup> Saveen palelaan tiou naol tonene, ighaze ugham ngar padi pooi, nene pale Maaron tau ipaghazonan ghom pa pughu. Leso uwatag sa ngar to yom irau utaghoni.

<sup>8-9</sup> Matam ingal Yesu Krisi irau sawa isob. Ye ivot ila sin to kinik David. Ve imaat, ve Maaron ipamundigini pa mateen. You navovotia varu poia tonene pa tamtoghon, tauto nambadbaad patañani, ve aazne naneep ila ruum to yabyabuun lolo ve tikau ghou pa sen inimale you ngeu samia. Eemoghon Maaron aliña, yes irau tipoon ataam pani maau.

*Ro 1:3; 1Kor 15:4; Pil 1:12+; Kol 4:3*

<sup>10</sup> Tauto nayoona ariña pa badoon patañani naol to igham ghou ne. Pasa, you naghaze nauul yes to Maaron isia di tinim le. Leso tineep tunja ila to Yesu Krisi, ve igham mulin di, ve tineep toman Maaron ila nguruba lolo itaghoni taghoni gha ila.

*Kol 1:24*

<sup>11</sup> Saveen to naghaze nasavia, nene onoon moghon. Irau taghur ila kat:

“Ighaze iit talup toman Krisi pa mateen toni, nene pale taneep mataad iyaryaar tomani.

<sup>12</sup> Ve ighaze tayoona ariña ve tambaad patañani pa ye iza, nene pale itinja Krisi tagham pooz. *Ro*

*8:17; 1Pe 4:13*

Eemoghon ighaze tapul muriid pani ve tape-samun iza, ye pale ipul muri pait, ve ipesamun izaad paam. *Mt 10:33*

- <sup>13</sup> Sawa pida, iit tataghon saveeņ mbuaaņ toit toman Krisi maau.  
Eemoghon ye, ghoru itaghon saveeņ mbuaaņ toni irau sawa isob.  
Pasa, űgar toni ineep pataghaaņ to muuņ ve inim. Irau itortoora maau.” *Nam 23:19; Ro 3:3+; 1Kor 1:9*

*Timoti irau inim uraata poia to Maaron*

<sup>14</sup> Saveeņ tiou tonene, you naghaze yom up-amundigin tamtoghon űgar todi pani irau sawa isob, lesu matadi kisini. Ve avom iyaryaaņ padi ila Maaron mata, lesu tiwazoran di pa saveeņ soroksorok sob. Pasa, saveeņ tovene irau iuul ghiit rita maau. Nene iwaghamun yes to tiloņlooņa. *1Tim 6:4; Tit 3:9*

<sup>15</sup> Uzuaria ghom le uraat tiom isob denja moghon ila Maaron mata. Ve uvotia katin saveeņ onoon pa tamtoghon itaghon űgar to Maaron. Lesu mayam ila ye mata sob, ve ighita ghom ighaze yom uraata toni poia eez.

<sup>16-17</sup> Saveeņ soroksorok to taan to tamtoghon avodi burburia pani, yom uneep saganu pani. Pasa, saveeņ tovene pale ipaghau tamtoghon pa ataam to Maaron, ve tila tila le tisami kat. Nene inimale moroghoon samia to ivot inim tiina, ve iwaghamun tamtoghon le tisami. Ndiran ru to tisasavia saveeņ tovene, nene Imeneus ve Piletus. *1Tim 1:4,20, 4:7; Tit 1:14*

<sup>18</sup> Yesuru tipul ataam to saveen onoon wa. Pasa, tivovotia saveen kaarom pa tamtoghon tighaze mundigiin to yes mateenja, nene ivot wa. Ve muri, mundigiin ite paam muul maau. Saveen todi tonowen iwaghamun tamtoghon pida ghurla todi wa. *1Kor 15:12; 2Tes 2:2+*

<sup>19</sup> Eemoghon Maaron ipayoon lupuun toni izala gungun ariana eez, ve imbood saveen waaro ru izala. Eez isaav tovene: “Maaron iwatag tamtoghon toni.” Ve ite isaav ighaze: “Tamtoghon tisob to tivotia Yesu iza tighaze ye Tiina todi, nene yes irau tipul muridi pa ngar samia, ve tineep sagan panii.” Saveen ru tonene tinim ghilaloon pa tamtoghon to Maaron. *Yo 10:14,27*

<sup>20</sup> Ruum tiina, nene mbbeb naol naol tinimale uur ve oon tineep iloon ila. Pida, tigharaat di pa gol ve silva. Ve pida, tigharaat di pa taan ma ai. Pida, to uraat tintina. Ve pida, to uraat soroksorok. *Ro 9:21; 1Kor 3:12+*

<sup>21</sup> Iit tamtoghon tovene paam. Ighaze ngeu eta ipul ngar samia ineep, ve igharaat tau leso ingalaan ila Maaron mata, ye pale inim uur patabuan to poia pa ghamuun uraat tintina to Maaron. Ye pale irau iuul Tiina toni, ve igham uraat popoia to naol ne. *2Tim 3:17*

### *Ngar to mbesoona poia to Maaron itaghoni*

<sup>22</sup> Tovenen yom uneep sagan pa ngar samiamia naol to ndipain tighamgham di. Ve yamja tamtoghon tisob to tisunsun pa Maaron toman lolodi ngalaanja, azuaria gham pa aneep denjamim ila Maaron mata, ve aghur ila toni ariana, ve lolomim pa tamtoghon ve agham poian di, ve alup

lolomim inim ee moghon, ve ataghon n̄gar luuma.

*1Tim 1:5, 6:11; Hib 12:14*

<sup>23</sup> Eemoghon yes to tikankaan pa Maaron, ve tiyouyou avodi, ve tiwazoran di pa saveeñ soroksorok, yom ula toman di pa saveeñ todi malep. Pasa, yom uwatag: Saveeñ tovene, nene ipamundigin n̄oñaan ve malmal moghon. *Tit 3:9*

<sup>24</sup> Tamtoghon to ighaze inim mbesoña to Maaron, nene irau ate yabyab soroksorok ve in̄oñoon ne maau. Ye irau igham poian tamtoghon tisob, ve ipatoon n̄gar luuma padi. Ve ye irau le n̄gar pa uraat to patoñaan tamtoghon pa Maaron aliña. Ighaze tamtoghon tigham samini, nene irau in̄oon maau. Ye irau itatan ate, ve imbaada moghon. *1Tim 3:2+; Tit 1:7+*

<sup>25</sup> Ve ighaze tamtoghon pida tizoor aliña, ye irau ipasalungan di toman saveeñ luuma. Pasa ighaze igham tovene, nene pale inim ataam pa Maaron igham di titor n̄gar todi, ve n̄gar todi ivot ve tighazoon pa saveeñ onoon. *Ga 6:1; 2Tim 4:2*

<sup>26</sup> Leso tighilaal, ve tipas taudi pa liis to N̄geu Samia. Pasa, ye to iliis di pa liis toni, ve ighamgham pooz padi lesa titaghon n̄gar toni.

### 3

#### *Muri, tamtoghon pale titaghon n̄gar samia*

<sup>1</sup> Timoti, you naghaze yom uwatag kat tovene: Muri, patañani naol pale tivot. *1Tim 4:1; 2Pe 3:3*

<sup>2</sup> Pasa, tamtoghon pale lolodi pa taudi moghon, ve tighur lolodi kat pa yaam. Ve tipapait taudi izadi tighaze tilib pa nditadi pida. Ve tipipiyaav saveeñ samsamia pa nditadi, ve tizooroor nditamandi



ve nditinandi alinjadi. Ngar popoia to Maaron ve tamtoghon tighamgham padi ne, yes pale tighita inimale mbeb sorok, ve lolodi imaghmaagh pani. Ve ledi roroniin pa Maaron maau. Pale tivelegi inimale mbeb sorok. *Ro 1:29+; Jud 18*

<sup>3</sup> Ve yes pale lolodi pa tonvetaz todi paam maau. Ighaze atedi yabyab, nene irau atedi izi rikia maau. Pale tikis malmaliin todi ariana. Ve yes pale tingal saveen naol pa nditadi. Ve irau tingin taudi pooi maau. Ngar todi, nene inimale mbeb sagsag. Pasa, lolodi isamin tamtoghon rita maau, ve tiwaghamun di sorok. Yes pale tighur koi pa ngar popoia to naol ne,

<sup>4</sup> ve tighur nditadi tila koiadi nimadi. Ve ledi gabizoon maau. Tila pa naghodi moghon. Ve tipait taudi izadi. Tovenen yes pale lolodi pa Maaron maau. Lolodi pa mbeb to ulidi moghon.

<sup>5</sup> Yes pale tiparim taudi tighaze titaghon Maaron ngar toni. Eemoghon ngar to tighami, nene pale ipatoon di ighaze yes tiwatag Maaron tapiri rita maau. Ndiran tovene, yom uneep sagan padi. *Mt 7:21; Tit 1:16*

<sup>6</sup> Tamtoghon todi pida pale titoova pa tiloon tila ruum to yes ndiliva to ledi ghilaloon maau, ve tigham saveen ngoreen padi leso titaghon di pa ngar todi. Ndiliva tonowen tighilaal tighaze yes tigham sosor katindi, ve lolodi ipatanan pani. Eemoghon irau tipul ngar todi tonowen ne maau. Pasa sawa isob, ngar samsamia naol naol tipapazaagh di.

<sup>7</sup> Yes ndiliva tovene, lolodi tighaze le tilonloon saveen to tamtoghon tipatoot di pani. Eemoghon ngar todi irau ivot kat pa saveen onoon to Maaron

ne maau.

*Tit 1:11*

<sup>8</sup> Ndiran kaaromņa tonowen tizorzoor saveeņ onoon inimale muuņ Yanes yesuru Yamberes tizoor Mose.\*

Ngeu Samia ighamun ngar todi kat, ve tighamgham kaarom pa ghurla todi. Tauto Maaron ipul muri padi wa.

<sup>9</sup> Eemoghon uraat todi pale irau ighur kat maau. Pasa, ngar to muuņ ivot pa Yanes ve Yamberes, nene pale ivot padi paam. Pale titoova le maau, ve ival tiina tighilaal di tighaze ledi ngar maau. Ngar todi inimale borouņa.

*Paulus ipalot Timoti muul*

<sup>10-11</sup> O Timoti, yom unum toman ghou, ve sawa naol ituru talaghlaagh. Tovenen ngar to nasasavia pa tamtoghon, laghoon tiou, mbeb to nazuaria ghou pani, ghurla tiou, gabuag to natatan taug ve nayoon ariana pa badoon pataņani, ve ngar tiou to lolog pa tamtoghon ve naghamgham poian di, nene taum ughita di wa. Ve pataņani naol to tamtoghon tighurghur di payou, nene paam yom uwatag di. Muuņ, tigham samin ghou kat izi ndug Antiok, Ikonium, ve Listara. Eemoghon Maaron ipas ghou navot pa pataņani tiou tisob tonowen.

*Mbo 34:19; Mbanj 13:50, 14:5,6,19*

<sup>12</sup> Onoon kat, ndiran tisob to tineep tunja ila to Yesu Kresi ve titaghon katin Maaron ngar toni, tamtoghon pale tighur pataņani padi. *Yo 15:18+; Mbanj 14:22; 1Tes 3:3*

---

\* **3:8:** Ughita Igham (Kisim Bek) 7:11+. Kamos munġinadi pida to yes Yuda tisaav tovene: Yes mura to Isip to muuņ yesņa Mose tiwatovan tapiridi, tamtoghon todi ru izadi Yanes ve Yamberes.

<sup>13</sup> Ve ndiran samsamiadi ve ndiran kaaromja to tipaghau tamtoghon pa ataam to Maaron, nene pale tinoknok ghamuun ngar todi samia tonowen ila ila le inim tiina kat. Tovenen kaarom todi pale iweu tamtoghon tiyel pa ataam to Maaron. Ve taudi tiyel pani paam. Pasa, tighur ila ngar kaarom.

<sup>14</sup> Eemoghon yom irau matam kisin saveen onoon to uloonja ve ughur ila, ve utaghoni. Pasa, yei to nipatoot ghom pa saveen tonenen, yom uwatag ghei wa. *2Tim 2:2*

<sup>15</sup> Sawa to pain ghom ve inim, utub toman Maaron aliija patabuanj to timbooda. Saveen tonowen irau ipatoonj ghom pa Maaron ngar toni, lesu ughazoonj kat pa ataam to ye igham mulin ghiit pani. Ataam tonowen, nene vene: Ighaze taghur ila to Yesu Krisi ve taneep tunja ila toni, nene pale taneep pooi. *Mbo 119:105,130*

<sup>16</sup> Maaron aliija isob to timbooda, nene Maaron Avuvu ipamundigin tamtoghon, tauto timbooda. Saveen toni iuluul ghiit pa tapasalungan tamtoghon ve tapatoot di pa Maaron ngar toni. Leso tiwatag saveen onoon, ve tighilaal sosor todi ve tipuli, ve titaghon ngar denja moghon. *Ro 15:4; 2Pe 1:20+*

<sup>17</sup> Tovenen ighaze Maaron tamtoghon toni eta iwatag katin saveen toni, ye pale iraua kat pa ghamuunj uraat popoia to naol ne.

## 4

### *Paulus isaav ariana pa Timoti*

<sup>1</sup> Muri pale Tiina toit Yesu Krisi imuul inim, ve ipatoonj pooz toni ivot ighazoonj, ve ingabiiz

tamtoghon tisob ve ighur atia padi. Yes to ti-  
neep matadi iyaryaar, ve yes mateeja paam. You  
nasaav ariana payom ila yesuru Tama Maaron  
matadi naghaze: *Mbanj 10:42; 1Pe 4:5*

<sup>2</sup> Uvotia Maaron aliña pa tamtoghon irau sawa  
isob. Ighaze uneep ila sawa poia ve tamtoghon  
lolodi pa tilooñ ghom, ma uneep ila sawa samia  
ve tiyasiil pa saveeñ tiom, yom irau uyoon ariana  
pa badooñ patañani ve upatoot di kat pa Maaron  
aliña. Uvotia saveeñ kaarom ve ñgar samia to  
tamtoghon ivot ighazooñ, ve avom iyaryaan padi  
leso tipuli. Ve upalot di pa titaghon Maaron ñgar  
toni. *1Tim 4:13; 2Tim 2:25; Tit 2:15*

<sup>3</sup> Pasa muri, sawa eta pale ivot, ghoru tam-  
toghon lolodi pa tilooñ saveeñ poia to itaghon  
Maaron ñgar toni ne maau. Taliñadi pale igham  
pa loñaan saveeñ soroksorok moghon. Tovenen  
yes pale tiyou ndiran kaaromña katindi tinim, ve  
tighur di tinim patoñaan padi. Pasa, yes tiwatag:  
Ndiran tonowen pale tipul di titaghon taudi lolodi  
ve ñgar todi. *1Tim 4:1*

<sup>4</sup> Sawa tonenen ighaze ivot, tamtoghon pale  
tipoon taliñadi pa saveeñ onoon to Maaron ve  
tipul muridi pani, ve tighur taliñadi pa vuvuaan  
soroksorok.

<sup>5</sup> Eemoghon yom irau atem imaat, ve ugham  
ñgar pooi irau sawa isob, ve uyoon ariana pa  
badooñ patañani, ve uvotia varu poia pa yes to  
tighur ila sone. Tinim imbees pa uraat to Maaron  
ighuri ilat nimam, ve ugham uraata le anoña ivot.  
*2Tim 1:8, 2:3; 1Pe 1:13*

*Paulus sawa toni inim igharau wa*

<sup>6</sup> Pasa, sawa to napul taan, nene inim igharau wa. Mala maau pale siñ tiou imaliñ inimale vaen to tiliñi izala watoonrau pogho. *Pil 2:17*

<sup>7</sup> You naparab ariana pa varu poia le nalib wa. You napariaañ ghou ve rismoghon, ghoru napa-sob landooñ tiou tonene. Ve ghurla tiou, nene nakiskisi sone. *1Kor 9:24+; 1Tim 6:12; Hib 12:1*

<sup>8</sup> Tovenen atia poia to yes to tiparab ariana le tilib, tauto isasañan ghou. Atia tonowen, nene vene: Sawa to Mboñ Muri, Tiina toit to gabizooñ toni denja moghon, ye pale ighita ghou ighaze you ngeu denjiag. Ve you moghon maau. Tamtoghon tisob to lolodi pani, ve tighaze le tighita mulaañ toni, nene ye pale igham ngar raraate moghon padi. *Yems 1:12; 1Pe 5:4; Syg 2:10*

*Paulus ipasul Timoti ighaze ila ighita rikia*

<sup>9</sup> O Timoti, utoova pa unum rikia.

<sup>10</sup> Pasa, mbeb to taan igham Demas mata, ve ipul ghou ve ighau ila pa ndug Tesalonika wa. Ve Kresenes, ye ila pa taan suruvu to Galesia, ve Titus ila pa taan suruvu to Dalmatia. *Kol 4:14; 1Yo 2:15*

<sup>11</sup> Ve Lukas enjeni, tauto yeru ninepneep. Tovenen naghaze ugham Markus, ve yamru anim. Pasa, ye irau iuul ghou kat pa uraat to Maaron. *Mbanj 15:37+; Kol 4:10,14*

<sup>12</sup> Tikikus, you nambaaña ilat pa ndug Epesus wa.

<sup>13</sup> Nonogiina tiou to moñeñaan, napuli ineep Karpus ruum toni izi ndug Troas. Sawa to ughaze unum, ghoru matam ingali ve ughami inim. Ve ugham rau tiou tinim paam. Ve rau tiou to tigharaat di pa ngai uli, nene matam ingal di kat, ve ugham di tinim. Lolom imaagh padi malep.

<sup>14</sup> Aleksander to ngeu to gharatoonj mbeb pa mbaras ve ain, ye igham ngar samia to iwaghamun ghou kat. Ngar to igham payou, muri Maaron tau pale iyati.

<sup>15</sup> Tovenen matam imosmoos pooi pani. Pasa, ye izoor katin saveenj tiei. *1Tim 1:20*

<sup>16</sup> Sawa inim mata to tipayoon ghou pa navotia taug pa uraat tiou, tamtoghon eta iyoon murig ve ipariaan saveenj tiou maau. Maau kat. Tisob tighau payou. Eemoghon you nasun Maaron naghaze mata kisin sosor todi tonowen ve iyati malep.

<sup>17</sup> Onoon, you engengou. Eemoghon Maaron ineep toman ghou ve ipalot ghou. Tauto navotia katin varu poia pa yes to Yuda maau ne, ve tisob tiloonja. Sawa tonenen, naghaze pale namaat. Eemoghon maau. Maaron iuul ghou, ve ipas ghou navot ila laion avo.

<sup>18</sup> Ve you naghur ila ariana naghaze ye pale igham mulin ghou pa ngar samsamia tisob to tamtoghon tighaze tigham di payou ne, ve mata payou pooi le igham ghou nala naneep tomani izi ndug toni sambam. *Mbo 121:7*

Ye iza tiina kat pa tapiri ve poia toni. Tovenen paitoonj toit inarua irau sawa isob. To aazne ve itaghoni taghoni gha ila. Onoon.

### *Paesiinj pida to Paulus*

<sup>19</sup> Ugham ndag poia tiou pa Prisila yesuru Akwila, ve Onesiporus toman yes to tineep tomani ila ruum toni paam. *Mbanj 18:2+; 2Tim 1:16+*

<sup>20</sup> Erastus, you napuli ineep izi ndug Korin. Ve Tropimus, ye imoroonj ve napuli ineep izi Miletus. *Mbanj 19:22, 20:4, 21:29*

<sup>21</sup> Timoti, utoova pa unum rikia. Pasa, mala maau pale ndug isami ve yaunja tiina ivot.

Eubulus, Pudes, Linus, ve Klaudia, toman tonvetaz to Krisi tisob to yeinja ninepneep ne, yes tigham ndag poia todi payom.

<sup>22</sup> Timoti, Tiina toit pale ineep toman ghom, ve poia toni iza to yam asob. Onoon.

**Maaron Saveen Toni Patabuan**  
**The New Testament and portions of the Old Testament**  
**in the Oov Dialect of the Saveeng language of Papua**  
**New Guinea. The Saveeng language is also called Mutu**  
**or Mutu-Tuam.**

**Sampela hap Buk Baibel long tokples Saveeng Oov**  
**long Niugini**

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 18 Apr 2025 from source files dated 31 Aug 2023

c7a45d99-91a2-564f-9c55-d2efc8be7fae